



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ ՔՆՆՈՂ ԱՆՁ**

ք. Երևան

12.12.2019թ.

**Ո Ր Ո Շ ՈՒ Մ  
ՀՀ ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ  
ՔՆՆՈՂ ԱՆՁԻ  
թիվ ՍՑ-ԼՕ-2019/237**

Նախագահությամբ՝ ՀՀ գնումների հետ կապված բողոքներ քննող անձ Լ. Օհանյանի  
Քարտուղարությամբ՝ Ռ.Մկրտչյանի

Պատվիրատու՝ ՀՀ պաշտպանության նախարարություն  
Մասնակից՝ «Դ-Լ 777 ԳՐՈՒՊ» ՍՊԸ և «Հայգեր Բաս Քոնսիանի Լիմիթիդ» ՍՊԸ  
(համատեղ գործունեության պայմանագիր)

Մասնակցությամբ՝  
«Դ-Լ 777 ԳՐՈՒՊ» ՍՊԸ-ի և «Հայգեր Բաս Քոնսիանի Լիմիթիդ» ՍՊԸ-ի (համատեղ  
գործունեության պայմանագիր) ներկայացուցիչ՝ Հ. Դալլաքյանի, Գ. Աբաջյանի, Գ.  
Գրիգորյան

Գնման ընթացակարգի ծածկագիրը և առարկան՝  
«ՀՀ ՊՆ ՆՏԱԴ-ՀԲՄԱՊՁԲ-20-4/1» ծածկագրով հրատապ բաց մրցույթ, ՀՀ ՊՆ  
կարիքների համար մինիավտոբուսների ձեռքբերում

ՀՀ գնումների հետ կապված բողոքներ քննող անձը (այսուհետ՝ նաև Բողոքներ  
քննող անձ)՝ ուսումնասիրելով Հայաստանի Հանրապետության ֆինանսների  
նախարարության կողմից 04.12.2019թ.-ի թիվ 26/26-1/20091-2019 գրությամբ «Դ-Լ 777  
ԳՐՈՒՊ» ՍՊԸ-ին և «Հայգեր Բաս Քոնսիանի Լիմիթիդ» ՍՊԸ-ին (համատեղ

գործունեության պայմանագիր) գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգով ներկայացված հիմքերը,

## Պ Ա Ր Զ Ե Ց

### 1. Գործի նախապատմությունը

ՀՀ ֆինանսների նախարարությունը, ՀՀ պաշտպանության նախարարության (այսուհետ՝ Պատվիրատու) 02.12.2019թ. թիվ ՊՆ/02/2701 գրության հիման վրա, 04.12.2019թ.-ին «Դ-Լ 777 ԳՐՈՒՊ» ՍՊԸ-ին և «Հայգեր Բաս Քոմփանի Լիմիթիդ» ՍՊԸ-ին (համատեղ գործունեության պայմանագիր) գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնել է ընթացակարգ՝ Բողոքներ քննող անձին ներկայացնելով համապատասխան հիմքերը:

Բողոքներ քննող անձի գործը մակագրվել է 04.12.2019թ.-ի և նույն օրը կայացված որոշմամբ գործը ընդունվել է վարույթ ու 10.12.2019թ.-ին նշանակվել է նիստ:

Գործի քննությունն ավարտվել է 10.12.2019թ.-ին և Բողոքներ քննող անձի որոշման հրապարակման օր է նշանակվել 12.12.2019թ.-ին:

### 2. ՀՀ պաշտպանության նախարարության ներկայացրած փաստերը և դիրքորոշումը.

ՀՀ պաշտպանության նախարարությունը 02.12.2019թ. թիվ ՊՆ/02/2701 գրությամբ դիմել է ՀՀ ֆինանսների նախարարությանը հայտնելով հետևյալը.

««Հայտնում եմ, որ «ՀՀ ՊՆ ՆՏԱԴ-ՀԲՄԱՊԶԲ-20-4/1» ծածկագրով ընթացակարգի հայտերի գնահատման արդյունքում «Դ-Լ 777 ԳՐՈՒՊ» ՍՊԸ-ն (կոնսորցիում «Հայգեր Բաս Քոմփանի Լիմիթիդ» ՍՊԸ-ի հետ) (այսուհետ՝ նաև Կոնսորցիում) հանձնաժողովի որոշմամբ ճանաչվել է 1-ին տեղ զբաղեցնող մասնակից: Սահմանված կարգով վերոնշյալ մասնակցին *armeps* համակարգի ոչ ավտոմատ ծանուցմամբ առաջարկվել է ներկայացնել որակավորման չափանիշները հիմնավորող՝ հրավերով նախատեսված փառաբանությունները, սակայն ներկայացված փաստաթղթերում առկա էին մի շարք անհամապատասխանություններ:

Հանձնաժողովի կողմից Կոնսորցիումին առաջարկվել է երեք աշխատանքային օրվա ընթացքում շտաբի անհամապատասխանությունները, սակայն մասնակցի կողմից ներկայացված շտաբի անհամապատասխանությունները հանձնաժողովի կողմից գնահատվել են հրավերի պահանջներին չհամապատասխանող, ինչի արդյունքում վերջինիս հայտը մերժվել է:»:

Միևնույն ժամանակ, հիմք ընդունելով ՀՀ կառավարության 2017թ. մայիսի 4-ի թիվ 526-Ն որոշմամբ հաստատված «Գնումների գործընթացի կազմակերպման» կարգի 45-րդ կետը, ներկայացվել է թիվ «ՀՀ ՊՆ ՆՏԱԴ-ՀԲՄԱՊՁԲ-20-4/1» ծածկագրով հրատապ բաց մրցույթ ընթացակարգի շրջանակներում «Դ-Լ 777 ԳՐՈՒՊ» ՍՊԸ-ի և «Հայգեր Բաս Քոնփանի Լիմիթիդ» ՍՊԸ-ի (համատեղ գործունեության պայմանագիր) վերաբերյալ անհրաժեշտ փաստաթղթերը, որոնք կցվել են ՀՀ ֆինանսների նախարարությանն ուղղված գրությանը:

**3. «Դ-Լ 777 ԳՐՈՒՊ» ՍՊԸ-ի և «Հայգեր Բաս Քոնփանի Լիմիթիդ» ՍՊԸ-ի (համատեղ գործունեության պայմանագիր) ներկայացրած փաստաթղթերը և դիրքորոշումը.**

Բողոքներ քննող անձը 04.12.2019թ.-ին գրությամբ դիմել է «Դ-Լ 777 ԳՐՈՒՊ» ՍՊԸ-ին և «Հայգեր Բաս Քոնփանի Լիմիթիդ» ՍՊԸ-ին (համատեղ գործունեության պայմանագիր)՝ հնարավորություն տալով ՀՀ ֆինանսների նախարարության կողմից 04.12.2019թ.-ի թիվ 26/26-1/20091-2019 գրությամբ նախաձեռնված ընթացակարգի վերաբերյալ ներկայացնել գրավոր կարծիք:

Մասնակիցը ստանալով կարծիք հայտնելու վերաբերյալ գրությունը, ինչպես նաև ծանուցված լինելով նիստերի տեղի, օրվա և ժամի մասին, չի ներկայացրել գրավոր դիրքորոշում, առարկություններ կամ կարծիք:

«Դ-Լ 777 ԳՐՈՒՊ» ՍՊԸ-ի և «Հայգեր Բաս Քոնփանի Լիմիթիդ» ՍՊԸ-ի (համատեղ գործունեության պայմանագիր) ներկայացուցիչները ներկայանալով հրավիրված նիստին, բանավոր կերպով հայտնել են, որ տեղեկացված են եղել ներկայացվող ապրանքի տեխնիկական բնութագրերի և հրավերով սահմանված տեխնիկական բնութագրերի միջև անհամապատասխանությունների մասին, սակայն մասնակցության հայտ են ներկայացրել «ՀՀ ՊՆ ՆՏԱԴ-ՀԲՄԱՊՁԲ-20-4/1» ծածկագրով ընթացակարգին:

**4. ՍՑ-ԼՕ-2019/237 ընթացակարգի քննության համար էական նշանակություն ունեցող փաստերը.**

Սույն գործի քննության համար էական նշանակություն ունեցող փաստերի համաձայն՝

ՀՀ պաշտպանության նախարարության (այսուհետ՝ Պատվիրատու) կողմից ՀՀ ՊՆ կարիքների համար մինիավտոբուսների ձեռքբերման նպատակով հայտարարավել է «ՀՀ ՊՆ ՆՏԱԴ-ՀԲՄԱՊՁԲ-20-4/1» ծածկագրով հրատապ բաց մրցույթ (այսուհետ՝ Մրցույթ):

Ընթացակարգին մասնակցելու նպատակով հայտ է ներկայացրել նաև «Դ-Լ 777 ԳՐՈՒՊ» ՍՊԸ-ն և «Հայգեր Բաս Քոնփանի Լիմիթիդ» ՍՊԸ-ն (համատեղ գործունեության պայմանագիր):

Մասնակիցը մասնակցության հայտի թիվ 3 հավելվածով՝ որակավորման չափանիշների պահանջներին բավարարելու մասին հայտարարությամբ, հայտարարել և հավաստել է, որ բավարարում է «ՀՀ ՊՆ ՆՏԱԴ-ՀԲՄԱՊՁԲ-20-4/1» ծածկագրով գնանշման հարցման հրավերով սահմանված որակավորման չափանիշների պահանջներին և պարտավորվում է առաջին տեղը զբաղեցրած մասնակից ճանաչվելու դեպքում նշված ծածկագրով գնանշման հարցման հրավերով սահմանված կարգով և ժամկետներում ներկայացնել որակավորումը հիմնավորող՝ հրավերով պահանջվող փաստաթղթերը:

Մասնակիցը մասնակցության հայտի թիվ 4 հավելվածով՝ առաջարկվող ապրանքի հրավերով նախատեսված տեխնիկական բնութագրերին համապատասխանության մասին հայտարարությամբ, հայտարարել և հավաստել է, որ «ՀՀ ՊՆ ՆՏԱԴ-ՀԲՄԱՊՁԲ-20-4/1» ծածկագրով բաց մրցույթին մասնակցելու նպատակով իր կողմից ներկայացված մասնակցության դիմումում նշված չափաբաժնի (չափաբաժինների) մասով առաջարկվող ապրանքի (ապրանքների) տեխնիկական բնութագրերը համապատասխանում են նույն հրավերի համապատասխան չափաբաժնում (չափաբաժիններում) նշված ապրանքի (ապրանքների) տեխնիկական բնութագրերի պահանջներին:

Նույն հավելվածով «Դ-Լ 777 ԳՐՈՒՊ» ՍՊԸ-ն և «Հայգեր Բաս Քոնփանի Լիմիթիդ» ՍՊԸ-ն (համատեղ գործունեության պայմանագիր) պարտավորվել է առաջին տեղը զբաղեցրած մասնակից ճանաչվելու դեպքում «ՀՀ ՊՆ ՆՏԱԴ-ՀԲՄԱՊՁԲ-20-4/1» ծածկագրով բաց մրցույթի հրավերով սահմանված կարգով և ժամկետներում ներկայացնել իր կողմից առաջարկվող ապրանքի (ապրանքների)՝ անվանումը, ապրանքային նշանը, արտադրողի անվանումը, ծագման երկիրը և տեխնիկական բնութագրերը (ապրանքի ամբողջական նկարագիր):

Ընթացակարգի գնահատող հանձնաժողովի (այսուհետ նաև՝ Հանձնաժողով) 04.11.2019թ.-ին կայացած նիստի թիվ 3 արձանագրության համաձայն՝ գնահատող

հանձնաժողովի 11.11.2019թ.-ի որոշմամբ ընթացակարգի 1-ին չափաբաժնի մասով 1-ին տեղ զբաղեցնող մասնակից է ճանաչվել «Դ-Լ 777 ԳՐՈՒՊ» ՍՊԸ-ին և «Հայգեր Բաս Քոմփանի Լիմիթիդ» ՍՊԸ-ին (համատեղ գործունեության պայմանագիր):

Նույն արձանագրության համաձայն՝ Հանձնաժողովը որոշել է առաջարկել 1-ին տեղ զբաղեցրած մասնակիցին, ծանուցումն ստանալու օրվանից հաշված երեք աշխատանքային օրվա ընթացքում ներկայացնել հրավերով սահմանված որակավորման չափանիշները հիմնավորող փաստաթղթերը և առաջարկված ապրանքի նկարագիրը:

Հանձնաժողովի 20.11.2019թ. կայացած նիստի թիվ 5 արձանագրության համաձայն՝ արձանագրվել է հետևյալը. ««Դ-Լ 777 ԳՐՈՒՊ» ՍՊԸ-ն ներկայացրել է (կոնսորցիում «Հայգեր Բաս Քոմփանի Լիմիթիդ» ՍՊԸ-ի հետ) «ՀՀ ՊՆ ՆՏԱԴ-ՀՐՄԱՊՁԲ-20-4/1» ծածկագրով ընթացակարգի հրավերով պահանջվող հավելված N°3-ը (ԴԻՄՈՒՄ առաջին տեղը զբաղեցրած մասնակցի կողմից հրավերով պահանջվող փաստաթղթերի ներկայացման), հավելված N°3.1-ը՝ ապրանքի ամբողջական նկարագիրը, սակայն դրանք հաստատված չեն էլեկտրոնային թվային ստորագրությամբ: «Մասնագիտական փորձառություն» որակավորման չափանիշը հիմնավորող փաստաթղթերը ընդհանրապես չեն ներկայացվել: Մասնակցի կողմից ներկայացված ապրանքի ամբողջական նկարագրում ևս առկա են անհամապատասխանություններ, մասնավորապես՝

Հրավերով սահմանվել է՝ շարժիչի աշխատանքային ծավալը, 2.2-2,5 խմ, այնինչ մասնակցի կողմից առաջարկվել է 2,982:

Հրավերով սահմանվել է՝ ընդհանուր երկար./լայն./բարձր., մմ 6704/2474/2746+3%, այնինչ մասնակցի կողմից առաջարկվել է 5995/2380/2645:

Հրավերով սահմանվել է՝ շրջադարձի տրամագիծը, մ 13.3 +3%, այնինչ մասնակցի կողմից առաջարկվել է 14.1:

Հրավերով սահմանվել է՝ վառելիքի ծախս (մայրուղային ցիկլում), լ/100կմ 8.0-8.5, այնինչ մասնակցի կողմից առաջարկվել է 8.7:

Հրավերով սահմանվել է՝ վառելիքի ծախս (խառը ցիկլում), լ/100կմ 9.3-10, այնինչ մասնակցի կողմից առաջարկվել է 10.6:

Հրավերով սահմանվել է՝ հետևի դռների բացվածքը 1800, աջակողմյան սլաքիկ դուռ առանց սահմանափակման բացվածքով, իսկ մասնակցի կողմից դրանց մասին տեղեկատվությունը ընդհանրապես չի ներկայացվել:

Հրավերով սահմանվել է՝ հագեցվածություն՝ ABS, ESP, EBL, EBA, ROM, GVM համակարգերով, այնինչ մասնակցի առաջարկում բացակայում են EBA, ROM, GVM համակարգերը:»:

Նույն արձանագրության համաձայն՝ Հանձնաժողովը ղեկավարվելով ՀՀ կառավարության թիվ 526-Ն առ 04.05.2017թ. որոշման 47-րդ կետի պահանջներով, հանձնաժողովը որոշեց նիստը կասեցնել երեք աշխատանքային օրով, հնարավորություն տալով «Դ-Լ 777 ԳՐՈՒՊ» ՍՊԸ-ին և «Հայգեր Բաս Քոմփանի Լիմիթիդ» ՍՊԸ-ին շտկել անհամապատասխանությունը:

Նույն արձանագրության համաձայն՝ Մասնակցի հայտը գնահատվել է անբավարար հետևյալ պատճառաբանությամբ. ««հավելվածներ N°3-ը (ԴԻՄՈՒՄ առաջին տեղը զբաղեցրած մասնակցի կողմից հրավերով պահանջվող փաստաթղթերի ներկայացման) և N°3.է-ը՝ ապրանքի ամբողջական նկարագիրը, հաստատված չեն էլեկտրոնային թվային ստորագրությամբ: Իսկ «Մասնագիտական փորձառություն» որակավորման չափանիշը հիմնավորող փաստաթղթերը ներկայացվել են թերի, մասնավորապես «ՀՀ ՊՆ ՆՏԱԴ-ՀԲՄԱՊՅԲ-20-4/1» ծակագրով ընթացակարգի հրավերի 1-ին մասի 2.5 կետի 1-ին ենթակետի համաձայն

1) «Մասնագիտական փորձառություն» որակավորման չափանիշը սահմանվում և գնահատվում է հետևյալ կարգով՝

ա. մասնակիցը պետք է հայտը ներկայացնելու տարվա և դրան նախորդող երեք տարվա ընթացքում պատշաճ ձևով իրականացրած լինի նմանատիպ առնվազն մեկ պայմանագիր: Նախկինում կատարված պայմանագիրը (կամ պայմանագրերը) գնահատվում է (կամ գնահատվում են) նմանատիպ, եթե դրա (դրանց) շրջանակներում մատակարարված ապրանքների ծավալը (կամ հանրագումարային ծավալը)՝ գումարային արտահայտությամբ, պակաս չէ տվյալ սույն ընթացակարգի շրջանակում մասնակցի ներկայացրած գնային առաջարկի հիսուն տոկոսից: Ընդ որում առնվազն մեկ պայմանագրի շրջանակում մատակարարված ապրանքների ծավալը գումարային արտահայտությամբ պետք է պակաս չլինի սույն Ընթացակարգի շրջանակում մասնակցի ներկայացրած գնային առաջարկի քսան տոկոսից:

Սույն ընթացակարգի իմաստով նմանատիպ են համարվում ավտոմեքենաների մատակարարված լինելը:

բ. սույն ենթակետի ա) պարբերությամբ նախատեսված պահանջներին իր համապատասխանությունը հիմնավորելու համար մասնակիցը հայտով ներկայացնում է իր կողմից հաստատված հայտարարություն, պայմանով, որ առաջին տեղը զբաղեցրած մասնակից ճանաչվելու դեպքում սույն հրավերով սահմանված կարգով և ժամկետներում հանձնաժողովին կներկայացնի նախկինում կատարած պայմանագրի (պայմանագրերի, համաձայնագրերի) պատճենները, իսկ այդ պայմանագրի (պայմանագրերի,

համաձայնագրերի) պատշաճ կատարումը գնահատելու համար՝ տվյալ պայմանագրի (համաձայնագրի) կողմերի հաստատման պայմանագրի սահմանված ժամկետում կատարումը հավաստող ակտի (հանձման-ընդունման արձանագրություն և այլն) պատճենը կամ տվյալ պայմանագրի կատարումն ընդունած կողմի գրավոր հավաստումը:)

Այսպիսով, «Դ-Լ 777 ԳՐՈՒՊ» ՍՊԸ-ի (կոնսորցիում «Հայգեր Բաս Քոնփանի Լիմիթիդ» ՍՊԸ-ի հետ) կողմից ներկայացված հավելվածներ N°N°3-ը ն. 3.1-ը հաստատված չեն էլեկտրոնային թվային ստորագրությամբ, իսկ «Մասնագիտական փորձառություն» որակավորման չափանիշը հիմնավորող փաստաթղթերում բացակայում են պայմանագրի սահմանված ժամկետում կատարումը հավաստող ակտի (հանձման-ընդունման արձանագրություն և այլն) պատճենները կամ տվյալ պայմանագրի կատարումն ընդունած կողմի գրավոր հավաստման բնօրինակից արտատպված (սկանավորված) տարբերակը:»:

Հանձնաժողովը ղեկավարվելով ՀՀ կառավարության թիվ 526-Ն առ 04.05.2017թ. որոշման 48-րդ կետի 2-րդ ենթակետի պահանջներով որոշել է մերժել «Դ-Լ 777 ԳՐՈՒՊ» ՍՊԸ-ի և «Հայգեր Բաս Քոնփանի Լիմիթիդ» ՍՊԸ-ի (համատեղ գործունեության պայմանագիր) հայտը:

## **5. Բողոքներ քննող անձի հիմնավորումները և եզրահանգումը.**

Բողոքներ քննող անձը լրիվ, օբյեկտիվ և բազմակողմանի հետազոտելով և գնահատելով սույն գործում առկա ապացույցները, և համադրելով դրանք գործով պարզված փաստական հանգամանքների հետ, հանգում է այն եզրակացության, որ ՀՀ ֆինանսների նախարարության 04.12.2019թ. թիվ 26/26-1/20091-2019 գրությամբ «Դ-Լ 777 ԳՐՈՒՊ» ՍՊԸ-ին և «Հայգեր Բաս Քոնփանի Լիմիթիդ» ՍՊԸ-ին (համատեղ գործունեության պայմանագիր) գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգը ենթակա է բավարարման, հետևյալ պատճառաբանությամբ.

«Գնումների մասին» ՀՀ օրենքի (այսուհետ նաև՝ Օրենք) 6-րդ հոդվածի 3-րդ մասի համաձայն՝ մասնակիցը պետք է բավարարի հրավերով սահմանված որակավորման չափանիշներին: Մասնակիցը պետք է ունենա պայմանագրով նախատեսված պարտավորությունների կատարման համար հրավերով պահանջվող՝ մասնագիտական փորձառություն:

ՀՀ կառավարության 04.05.2017թ. թիվ 526-Ն որոշմամբ հաստատված «Գնումների գործընթացի կազմակերպման» կարգի (այսուհետ նաև՝ Կարգ) 61-րդ կետի 1-ին ենթակետի

համաձայն՝ մասնակիցների՝ Օրենքի 6-րդ հոդվածի 3-րդ մասի 2-րդ կետով նախատեսված՝ «Մասնագիտական փորձառություն» չափանիշը գնահատվում է հետևյալ կարգով՝

1) հրավերով պահանջվում է, որ մասնակիցը հայտով ներկայացնում է հայտարարություն, որ հայտը ներկայացնելու տարվա և դրան նախորդող երեք տարվա ընթացքում պատշաճ ձևով իրականացրել է համանման (նմանատիպ) առնվազն մեկ պայմանագիր: Նախկինում կատարված պայմանագիրը (կամ պայմանագրերը) գնահատվում է (կամ գնահատվում են) նմանատիպ, եթե դրա (դրանց) շրջանակներում մատակարարված ապրանքների, մատուցված ծառայությունների և կատարված աշխատանքների ծավալը (կամ հանրագումարային ծավալը)՝ գումարային արտահայտությամբ, պակաս չէ տվյալ գնման ընթացակարգի շրջանակներում մասնակցի ներկայացրած գնային առաջարկի հիսուն տոկոսից, որից առնվազն մեկ պայմանագրի շրջանակներում մատակարարված ապրանքների, մատուցված ծառայությունների և կատարված աշխատանքների ծավալը գումարային արտահայտությամբ, պակաս չէ տվյալ գնման ընթացակարգի շրջանակներում մասնակցի ներկայացրած գնային առաջարկի քսան տոկոսից:

Հրավերի համաձայն՝

1) «Մասնագիտական փորձառություն» որակավորման չափանիշը սահմանվում և գնահատվում է հետևյալ կարգով՝

ա. մասնակիցը պետք է հայտը ներկայացնելու տարվա և դրան նախորդող երեք տարվա ընթացքում պատշաճ ձևով իրականացրած լինի նմանատիպ առնվազն մեկ պայմանագիր: Նախկինում կատարված պայմանագիրը (կամ պայմանագրերը) գնահատվում է (կամ գնահատվում են) նմանատիպ, եթե դրա (դրանց) շրջանակներում մատակարարված ապրանքների ծավալը (կամ հանրագումարային ծավալը)՝ գումարային արտահայտությամբ, պակաս չէ տվյալ սույն ընթացակարգի շրջանակում մասնակցի ներկայացրած գնային առաջարկի հիսուն տոկոսից: Ընդ որում առնվազն մեկ պայմանագրի շրջանակում մատակարարված ապրանքների ծավալը գումարային արտահայտությամբ պետք է պակաս չլինի սույն ընթացակարգի շրջանակում մասնակցի ներկայացրած գնային առաջարկի քսան տոկոսից:

բ. սույն ենթակետի ա) պարբերությամբ նախատեսված պահանջներին իր համապատասխանությունը հիմնավորելու համար մասնակիցը հայտով ներկայացնում է իր կողմից հաստատված հայտարարություն, պայմանով, որ առաջին տեղը զբաղեցրած մասնակից ճանաչվելու դեպքում սույն հրավերով սահմանված կարգով և ժամկետներում հանձնաժողովին կներկայացնի նախկինում կատարած պայմանագրի (պայմանագրերի) և



դրա հաշիվ ապրանքագրերի պատճենները, իսկ այդ պայմանագրի (պայմանագրերի) պատշաճ կատարումը գնահատելու համար՝ տվյալ պայմանագրի կողմերի հաստատած պայմանագրի սահմանված ժամկետում կատարումը հավաստող ակտի (հանձնան- ընդունման արձանագրություն և այլն) պատճենը կամ տվյալ պայմանագրի կատարումն ընդունած կողմի գրավոր հավաստումը:

գ. մասնակցի որակավորումը այս չափանիշի գծով գնահատվում է բավարար, եթե վերջինս ապահովում է սույն ենթակետով նախատեսված պայմաններն ու պահանջները.

Կարգի 32-րդ կետի 1-ին ենթակետի «գ» պարբերության համաձայն՝ մասնակիցը հայտով ներկայացնում է ... ապրանքների գնման դեպքում իր կողմից հաստատված հայտարարություն՝ առաջարկվող ապրանքի՝ հրավերով նախատեսված տեխնիկական բնութագրերին համապատասխանության վերաբերյալ՝ պայմանով, որ առաջին տեղն զբաղեցրած մասնակից ճանաչվելու դեպքում հրավերով սահմանված կարգով ներկայացնում է ապրանքի տեխնիկական բնութագրերը, իսկ հրավերով նախատեսված դեպքերում նաև առաջարկվող ապրանքային նշանը, արտադրողի անվանումը, ծագման երկիրը (այսուհետ՝ ապրանքի ամբողջական նկարագիր):

Հրավերով նախատեսված է նաև, որ մասնակիցը հայտով ներկայացնում է իր կողմից հաստատված հայտարարություն առաջարկվող ապրանքի հրավերով նախատեսված տեխնիկական բնութագրերին համապատասխանության վերաբերյալ, պայմանով, որ առաջին տեղը զբաղեցրած մասնակից ճանաչվելու դեպքում սույն հրավերով սահմանված կարգով և ժամկետում հանձնաժողովին է ներկայացնում ապրանքի տեխնիկական բնութագրերը, ինչպես նաև առաջարկվող ապրանքի անվանումը (այսուհետ՝ ապրանքի ամբողջական նկարագիր):

Կարգի 43-րդ կետի 4-րդ ենթակետի համաձայն՝ հայտերի բացման նիստի ավարտից հետո ոչ ուշ քան հաջորդող աշխատանքային օրը հանձնաժողովի քարտուղարը էլեկտրոնային փոստի միջոցով ծանուցում է առաջին տեղն զբաղեցրած մասնակցին՝ առաջարկելով ծանուցումն ուղարկելու օրվանից երեք աշխատանքային օրվա ընթացքում էլեկտրոնային փոստի միջոցով ներկայացնել որակավորման չափանիշները հիմնավորող՝ հրավերով նախատեսված փաստաթղթերը, բացառությամբ սույն կարգով նախատեսված դեպքերի, ապրանքների գնման դեպքում նաև սույն կարգի 32-րդ կետի 1-ին ենթակետի «գ» պարբերությամբ նախատեսված փաստաթուղթը, իսկ բանկային երաշխիքի ձևով ներկայացված հայտի ապահովման բնօրինակը՝ կից գրությամբ: Սույն մասով սահմանված ժամկետում փաստաթղթեր ընդհանրապես չներկայացվելու դեպքում հանձնաժողովը հայտերի գնահատման նիստում մերժում է առաջին տեղն զբաղեցրած մասնակցի հայտը և

փաստաթղթեր ներկայացնելու պահանջ է ներկայացնում հաջորդաբար տեղ զբաղեցրած մասնակցին:

Կարգի 46-րդ կետի համաձայն՝ սույն կարգի 43-րդ կետի 4-րդ ենթակետով նախատեսված ժամկետի ավարտին հաջորդող աշխատանքային օրը քարտուղարն էլեկտրոնային եղանակով հանձնաժողովի անդամներին միաժամանակ տրամադրում է առաջին տեղն զբաղեցրած մասնակցի կողմից ներկայացված փաստաթղթերի պատճենները, գնահատման թերթիկների երկուական օրինակ և կոմիտեից ստացված տեղեկատվությունը: Հայտերի գնահատման արդյունքների հաստատման նիստը հրավիրվում է ոչ ուշ, քան փաստաթղթերը հանձնաժողովի անդամներին տրամադրվելուն հաջորդող երրորդ աշխատանքային օրը: Ընդ որում, ապրանքների գնման դեպքում հանձնաժողովը գնահատում է նաև ներկայացված տեխնիկական բնութագրերի համապատասխանությունը հրավերի պահանջներին, իսկ անհամապատասխանություն արձանագրելու դեպքում հանձնաժողովի նիստի արձանագրության մեջ մանրամասն նկարագրվում են հայտնաբերված անհամապատասխանությունները:

Կարգի 47-րդ կետի համաձայն՝ առաջին տեղն զբաղեցրած մասնակցի կողմից փաստաթղթերն ամբողջական չներկայացվելու, ինչպես նաև ներկայացված՝ ներառյալ կոմիտեի կողմից տրամադրված որակավորման չափանիշները հիմնավորող՝ հրավերով նախատեսված փաստաթղթերի, իսկ ապրանքների գնման դեպքում նաև սույն կարգի 32-րդ կետի 1-ին ենթակետի «գ» պարբերությամբ նախատեսված փաստաթղթի գնահատման արդյունքում հրավերի պահանջների նկատմամբ անհամապատասխանություններ արձանագրվելու դեպքում հանձնաժողովի քարտուղարը նույն օրն էլեկտրոնային եղանակով ծանուցում է առաջին տեղն զբաղեցրած մասնակցին՝ առաջարկելով մեկ աշխատանքային օրվա ընթացքում շտկել անհամապատասխանությունը...:

Կարգի 48-րդ կետի համաձայն՝ առաջին տեղն զբաղեցրած մասնակցի կողմից արձանագրված անհամապատասխանությունը սահմանված ժամկետում՝

1) շտկելու դեպքում հայտը գնահատվում է բավարար և առաջին տեղն զբաղեցրած մասնակիցը հայտարարվում է ընտրված մասնակից:

2) չշտկելու դեպքում հանձնաժողովի որոշմամբ հայտը մերժվում է, և փաստաթղթեր ներկայացնելու պահանջ է ներկայացվում հաջորդաբար տեղ զբաղեցրած մասնակցին:

Վերոնշյալ իրավակարգավորումների վերլուծության արդյունքում, Բողոքներ քննող անձը հանգում է այն հետևության, որ մասնակիցը պետք է բավարարի հրավերով սահմանված որակավորման չափանիշներին՝ ունենալով պայմանագրով նախատեսված պարտավորությունների կատարման համար հրավերով պահանջվող մասնագիտական

փորձառություն, որի առկայության (համապատասխանության) դեպքում է հնարավոր հայտը գնահատել հրավերով նախատեսված պայմաններին համապատասխանող: Մասնակիցը նաև պարտավոր է ապրանքների գնման դեպքում ներկայացնել՝ իր կողմից հաստատված հայտարարություն առաջարկվող ապրանքի հրավերով նախատեսված տեխնիկական բնութագրերին համապատասխանության վերաբերյալ:

Այն դեպքում, երբ հայտերի բացման նիստի ավարտից հետո էլեկտրոնային փոստի միջոցով ծանուցված առաջին տեղն զբաղեցրած մասնակցի կողմից ներկայացված՝ որակավորման չափանիշները հիմնավորող՝ հրավերով նախատեսված փաստաթղթերը, ինչպես նաև առաջարկվող ապրանքների տեխնիկական բնութագրերը ներկայացվել են ոչ ամբողջական կամ դրանց գնահատման արդյունքում հրավերի պահանջների նկատմամբ արձանագրվել են անհամապատասխանություններ, ապա հանձնաժողովի քարտուղարը կրկին անգամ էլեկտրոնային եղանակով ծանուցում է առաջին տեղն զբաղեցրած մասնակցին՝ առաջարկելով մեկ աշխատանքային օրվա ընթացքում շտկել անհամապատասխանությունը:

Արձանագրված անհամապատասխանությունը սահմանված ժամկետում՝

1) շտկելու դեպքում հայտը գնահատվում է բավարար և առաջին տեղն զբաղեցրած մասնակիցը հայտարարվում է ընտրված մասնակից:

2) չշտկելու դեպքում հանձնաժողովի որոշմամբ հայտը մերժվում է, և փաստաթղթեր ներկայացնելու պահանջ է ներկայացվում հաջորդաբար տեղ զբաղեցրած մասնակցին:

Վերոնշյալ իրավական նորմերի և փաստական հանգամանքների հիման վրա Բողոքներ քննող անձն արձանագրում է, որ.

«Այս պաշտպանության նախարարության կողմից ՀՀ ՊՆ կարիքների համար մինիավտոբուսների ձեռքբերման նպատակով հայտարարված «ՀՀ ՊՆ ՆՏԱԴ-ՀԲՄԱՊՁԲ-20-4/1» ծածկագրով գնման ընթացակարգի արդյունքում 1-ին չափաբաժնի մասով 1-ին տեղ զբաղեցնող մասնակից է ճանաչվել «Դ-Լ 777 ԳՐՈՒՊ» ՍՊԸ-ն և «Հայգեր Բաս Քոնփանի Լիմիթիդ» ՍՊԸ-ն (համատեղ գործունեության պայմանագիր):

Հանձնաժողովի 20.11.2019թ. կայացած նիստի թիվ 5 արձանագրության համաձայն՝ Մասնակցի կողմից ներկայացված հրավերով սահմանված որակավորման չափանիշները հիմնավորող փաստաթղթերում, ինչպես նաև թիվ 6.1 հավելվածում արձանագրվել են անհամապատասխանություններ, ինչով պայմանավորված նիստը կասեցվել է երեք աշխատանքային օրով, հնարավորություն տալով «Դ-Լ 777 ԳՐՈՒՊ» ՍՊԸ-ին և «Հայգեր Բաս Քոնփանի Լիմիթիդ» ՍՊԸ-ին (համատեղ գործունեության պայմանագիր) շտկել արձանագրված անհամապատասխանությունները:

Նույն արձանագրության համաձայն՝ Մասնակցի հայտը գնահատվել է անբավարար, քանի որ «Դ-Լ 777 ԳՐՈՒՊ» ՍՊԸ-ի և «Հայգեր Բաս Քոնփանի Լիմիթիդ» ՍՊԸ-ի (համատեղ գործունեության պայմանագիր) կողմից ներկայացված հավելվածներ №3-ը և №3.1-ը հաստատված չեն էլեկտրոնային թվային ստորագրությամբ, իսկ «Մասնագիտական փորձառություն» որակավորման չափանիշը հիմնավորող փաստաթղթերում բացակայում են պայմանագրի սահմանված ժամկետում կատարումը հավաստող ակտի (հանձման-ընդունման արձանագրություն և այլն) պատճենները կամ տվյալ պայմանագրի կատարումն ընդունած կողմի գրավոր հավաստման բնօրինակից արտատպված (սկանավորված) տարբերակը:

Հանձնաժողովը, ղեկավարվելով Կարգի 48-րդ կետի 2-րդ ենթակետի պահանջներով, որոշել է մերժել Մասնակցի հայտը:

Օրենքի 6-րդ հոդվածի 1-ին մասի 6-րդ կետի «ա» ենթակետի համաձայն՝ ... մասնակիցն ընդգրկվում է գնումների գործընթացին մասնակցելու իրավունք չունեցող մասնակիցների ցուցակում, եթե խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը:

Նույն հոդվածի 2-րդ մասի համաձայն՝ գնումների գործընթացին մասնակցելու իրավունքից զրկված մասնակցի վերաբերյալ ունեցած տեղեկությունների հիման վրա լիազորված մարմինը ընթացակարգ է նախաձեռնում: Տվյալ մասնակցի կարծիքը լսելուց հետո գնումների հետ կապված բողոքներ քննող անձը նույն օրենքի 50-րդ հոդվածի 6-րդ մասով սահմանված ժամկետում որոշում է կայացնում մասնակցին նույն հոդվածով նախատեսված ցուցակում ընդգրկելու վերաբերյալ: Անձը նշված ցուցակում ընդգրկվում է երկու տարի ժամկետով:

Բողոքներ քննող անձը փաստում է, որ մասնակիցը ներկայացնում է որակավորման չափանիշները հիմնավորող՝ հրավերով նախատեսված փաստաթղթերի, ինչպես նաև առաջարկվող ապրանքի՝ հրավերով նախատեսված տեխնիկական բնութագրերին համապատասխանության մասին հայտարարություն (այսուհետ՝ Հայտարարություն): Եվ եթե Հայտարարությունը որակյալի որպես իրականությանը չհամապատասխանող կամ մասնակիցը հրավերով սահմանված կարգով և ժամկետներում չներկայացնի հրավերով նախատեսված փաստաթղթերը, ապա այդ հանգամանքը համարվում է որպես գնման գործընթացի շրջանակում ստանձնված պարտավորության խախտում: Նման դեպքում առաջանում է «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «ա»

ենթակետի դրույթների կիրառման անխուսափելիությունը, քանի որ Մասնակիցն իր գործողություններով կամ անգործությամբ, խախտելով գնման գործընթացի շրջանակում ստանձնած պարտավորությունը, հանգեցնում է պատվիրատուի կողմից գնման գործընթացին տվյալ մասնակցի հետագա մասնակցության դադարեցմանը:

Վերը շարադրվածից ելնելով՝ մասնակիցը պետք է ընդգրկվի գնումների գործընթացին մասնակցելու իրավունք չունեցող մասնակիցների ցուցակում, քանի որ խախտել է գնման գործընթացի շրջանակում ստանձնած պարտավորությունը՝ ներկայացնելով որակավորման չափանիշները հիմնավորող՝ հրավերով նախատեսված փաստաթղթերի և հրավերով սահմանված առաջարկվող ապրանքի՝ տեխնիկական բնութագրերին համապատասխանության մասին իրականությանը չհամապատասխանող հայտարարություն, որն էլ հանգեցրել է գնման գործընթացին տվյալ մասնակցի հետագա մասնակցության դադարեցմանը:

Այսպիսով, վերոհիշյալ փաստական հանգամանքների և իրավական նորմերի լույսի ներքո, դրանց համակարգված վերլուծության արդյունքում Բողոքներ քննող անձը հանգում է այն եզրակացության, որ «Դ-Լ 777 ԳՐՈՒՊ» ՍՊԸ-ն և «Հայգեր Բաս Քոնփանի Լիմիթիդ» ՍՊԸ-ն (համատեղ գործունեության պայմանագիր), Պատվիրատուի կողմից սահմանված շտկման ժամանակահատվածում, չներկայացնելով համապատասխանության շտկումներ՝ խախտել է գնման գործընթացի շրջանակում ստանձնած պարտավորությունը, որն էլ հանգեցրել է գնման գործընթացին տվյալ մասնակցի հետագա մասնակցության դադարեցմանը:

Բողոքներ քննող անձը հարկ է համարում նշել, որ Օրենքի 30-րդ հոդվածի 6-րդ մասի համաձայն՝ մասնակիցները կարող են գնման գործընթացին մասնակցել համատեղ գործունեության կարգով (կոնսորցիումով): Համատեղ գործունեության կարգով գնումների գործընթացին մասնակցության կարգը սահմանվում է հրավերով: Նման դեպքում՝

- 1) հայտը ներառում է նաև համատեղ գործունեության պայմանագիր.
- 2) հայտի գնահատման ժամանակ հաշվի են առնվում համատեղ գործունեության պայմանագրի բոլոր անդամների միասնական որակավորումները.
- 3) մասնակիցները կրում են համատեղ և համապարտ պատասխանատվություն.
- 4) համատեղ գործունեության պայմանագրի կողմը (կողմերը) չի (չեն) կարող նույն ընթացակարգին ներկայացնել առանձին հայտ (հայտեր):

Սույն դեպքում, հաշվի առնելով այն հանգամանքը, որ «ՀՀ ՊՆ ՆՏԱԴ-ՀԲՄԱՊԶԲ-20-4/1» ծածկագրով բաց մրցույթին մասնակիցները հանդես են եկել համատեղ գործունեության պայմանագրով (կոնսորցիում), ուստի մասնակիցները պետք է կրեն

համատեղ և համապարտ պատասխանատվություն, հիմք ընդունելով Օրենքի 30-րդ հոդվածի 6-րդ մասի 3-րդ ենթակետը:

Ելնելով վերոգրյալից և ղեկավարվելով «Գնումների մասին» ՀՀ օրենքի 6-րդ հոդվածի 2-րդ մասով, 30-րդ հոդվածի 6-րդ մասով, 50-րդ հոդվածի 7-րդ մասի 2-րդ կետով՝ ՀՀ գնումների հետ կապված բողոքներ քննող անձը

### **Ո Ր Ո Շ Ե Ց**

1. ՀՀ ֆինանսների նախարարության կողմից 04.12.2019թ. թիվ 26/26-1/20091-2019 գրությամբ «Դ-Լ 777 ԳՐՈՒՊ» ՍՊԸ-ին և «Հայգեր Բաս Քոնփանի Լիմիթիդ» ՍՊԸ-ին (համատեղ գործունեության պայմանագիր) գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված թիվ ՍՑ-ԼՕ-2019/237 ծածկագրով ընթացակարգը բավարարել:

2. «Դ-Լ 777 ԳՐՈՒՊ» ՍՊԸ-ին և «Հայգեր Բաս Քոնփանի Լիմիթիդ» ՍՊԸ-ին (համատեղ գործունեության պայմանագիր) ընդգրկել գնումների գործընթացին մասնակցելու իրավունք չունեցող մասնակիցների ցուցակում՝ 2 (երկու) տարի ժամկետով:

ՀՀ գնումների հետ կապված բողոքներ քննող անձի ընդունած որոշումն ուժի մեջ է մտնում այն տեղեկագրում հրապարակելուն հաջորդող օրը:

ՀՀ գնումների հետ կապված բողոքներ քննող անձի ընդունած որոշումն իրավապարտադիր է, որը կարող է փոփոխվել կամ վերացվել, այդ թվում՝ մասնակի, միայն դատարանի կողմից:

**ՀՀ ԳՆՈՒՄՆԵՐԻ ՀԵՏ ԿԱՊՎԱԾ  
ԲՈՂՈՔՆԵՐ ՔՆՆՈՂ ԱՆԶ՝**



**ԼԵՎՈՆ ՕՎԱՆՅԱՆ**